


CELEBRACIÓN EN OS COTOS (na igrexa)

28-29 de maio do 2022

FESTA DA ASCENSIÓN DO SEÑOR



OS COTOS COA IGUALDADE VERDADEIRA DAS PERSOAS,
COS POBOS QUE SOFREN INJUSTIZA E ABANDONO,
COS REFUXIADOS E MARXINADOS DA SOCIEDADE,
COA NATUREZA MALTRATADA
E CON RESPONSABILIDADE PERSOAL ANTE A COVID-19



1.- ENCONTRO DA COMUNIDADE

(tod@s de pé)

@ monitor/a está na sé

SAÚDO DE BENVIDA

🎵 *nº 1 ou 82 A Cristo cantamos*

Celebrante:

Benvidos sexamos todos a esta celebración. Reunímonos para compartir en comunidade a nosa fe no nome do Pai, do Fillo e do Espírito Santo.

Xa pasaron corenta días desde que celebramos a vixilia pascual, por iso compartimos hoxe a festa da Ascensión de Xesús.

No noso mundo “ascender” é quedar por riba dos outros, é superar aos demais, é ter poder...

No noso mundo ascender é competir, pero non é así para Xesús. Para El ascender é servir, é axudar a erguer, é estar a disposición dos demais, é darlles o que necesitan para a súa vida e a súa fe.

Hoxe para nós tamén é tempo de “ascensión”, porque queremos erguer a esperanza das persoas que están enfermas, queremos erguer un berro ben alto contra as armas, queremos erguer soños de paz, queremos erguer as nosas aldeas do rural, queremos erguer unha igrexa máis crible. Aquí está a nosa ascensión. Vivámola coa de Cristo sabendo que non nos deixa sós.

ACTO PENITENCIAL

Celebrante: *Recoñecemos agora que a nosa vida está chea de atrancos e medos que non nos deixan camiñar alegres e pesan no noso corazón. Para poder ser vida de Pascua temos que pedir perdón recoñecendo que non sempre somos cribles:*

Monitor/a

- Pedimos perdón polas veces que pretendemos estar por enriba de todos e de todo, e só nos preocupamos de nós mesmos. Señor, axúdanos a erguernos
- Pedimos perdón polas veces que non miramos polas persoas que necesitan unha man para erguer as súas vidas. Cristo, axúdanos a erguernos.
- Pedimos perdón polas veces que nos deixamos levar da agresividade e damos pé a unha sociedade con demasiadas armas. Señor, axúdanos a erguernos

Celebrante: *Deus todopoderoso teña piedade de nós, dos que teñen un lugar no noso corazón e na nosa vida. A todos nos conceda o Señor o perdón dos pecados, a todos nos abra os ollos á súa Pascua e a todos por Cristo Resucitado nos leve á vida eterna. Amén.*

ORACIÓN PROPIA DO DÍA

Celebrante: *Rematamos a primeira parte da celebración presentando no silencio o que rebule no noso interior. Facémolo doídos e necesitados de paz, lembrándonos de Andrés, e coa frustración do sucedido nesa escola de Estados Unidos.*

(Silenzo)

Celebrante:

Deus de misericordia, fainos reloucar con alegría nesta festa da Ascensión de Cristo, na que tamén nós somos elevados onda ti, pois á gloria onda se adiantou el coma cabeza da Igrexa, tamén estamos chamados nós.

Pedímoscho polo noso Señor Xesucristo Resucitado que vive e reina contigo na unidade do Espírito santo, por sempre eternamente. Amén.

2.- PROCLAMACIÓN DA PALABRA DE DEUS

(sentad@s) a palabra de Deus proclámase dende o ambón

Celebrante: *Os textos da biblia que hoxe proclamamos recollen a Ascensión de Xesús ao corazón do Pai. Pero ao mesmo tempo é o paso necesario para unha igrexa que necesita erguer e erguerse. Coa Ascensión de Xesús os discípulos atópanse coa encomenda de ser e dar exemplo do evanxeo. É agora a nosa responsabilidade. Escoitamos.*

LECTURA DO LIBROS DOS FEITOS DOS APÓSTOLOS

O primeiro libro fíxeno, Teófilo, acerca de todo o que Xesús obrou e ensinou desde o comezo, ata o día que foi levado ao ceo, logo de ter dado instrucións polo Espírito Santo aos apóstolos que escollera.

Aos mesmos que tamén se lles amosara vivo, con moitas probas despois da súa paixón, aparecéuselles durante corenta días e faláballes das cousas referentes ao Reino de Deus. E comendo con eles, encomendoulles que non se retirasen de Xerusalén, senón que agardasen a promesa do Pai que me escoitastes a min: porque Xoán bautizou con auga, mais a vós bautizarásevos co Espírito Santo, de aquí a poucos días.

Os que estaban reunidos preguntábanlle:

- Señor, é agora cando vas restablecer o Reino de Israel?

El respondeulles:

- Non vos acae a vós coñecer o tempo ou a oportunidade que o Pai fixou co seu propio poder. Pero recibiredes a forza do Espírito Santo, que virá sobre vós e seredes as miñas testemuñas en Xerusalén, en toda a Xudea e Samaría e ata os confíns da terra.

En dicindo isto, elevouse á vista deles e unha nube quitóullelo da súa vista. E estando eles fitando para o ceo

mentres el marchaba, presentáronselles dous homes con vestidos brancos, que dixeron:

- Galileos, que facedes ollando para o ceo? Este Xesús que vos foi levado de entre vós ao ceo, ha volver do mesmo xeito que o vistes ir.

Palabra do Señor

🎵 **nº 8 ou 55 No colo da miña nai SALMO**

(en pé) *Leccionario I C páx 153 Lc 24, 46-53 EVANXEO*

PROCLAMACIÓN DO SANTO EVANXEO SEGUNDO LUCAS

Daquela, Dilles Xesús aos seus discípulos:

- Así está escrito: o Mesías padecerá e resucitará de entre os mortos no terceiro día, e predicarase no seu nome a conversión e mailo perdón dos pecados a todos os pobos, empezando por Xerusalén. Vós seredes testemuñas de todo isto. E eu heivos mandar o don prometido por meu Pai. Mentres tanto seguíde na cidade, ata que se vos revista co poder que vén de arriba.

Despois levounos para fóra, a un lugar preto de Betania, e alí, erguendo as mans, bendiciunos. E mentres os bendecía, foise separando deles, e foi elevado ao ceo. Eles, despois de se prostraren ante el, voltaron para Xerusalén cheos de alegría. E seguían decote, no templo, bendicindo a Deus.

Palabra do Señor

(sentad@s) gardamos uns instantes de silencio para acoller a palabra no corazón



ACOLLIDA DA AUGA

Celebrante: *Fixemos memoria do noso bautismo na celebración da vixilia pascual. Alí compartíamos a auga de toda a comunidade de Os Cotos, e agora aquí ante a auga de vida que nos une en parroquia, queremos lembrar os compromisos, queremos sentirnos confiados en Deus, queremos ser a COMUNIDADE que dá unha man para erguer a cantos homes e mulleres se sinten afundidos.*

Celebrante *Agradécémoslle a Deus os dons da vida cos que El nos agasalla, e facémolo dicindo:*

BENDITO SEXAS POR SEMPRE SEÑOR

Monitor/a

* Deus creador de todas as cousas, que pola auga e o espírito, nos fixeche renacer á vida do evanxeo

BENDITO SEXAS POR SEMPRE SEÑOR

* Xesús, Ti que convidaches á primeira comunidade a ser testemuña anunciando o evanxeo a todas as xentes

BENDITO SEXAS POR SEMPRE SEÑOR

* Espírito Santo, que fas renacer á Igrexa polo alento da Pascua, e que nos convidas a ser auga viva

BENDITO SEXAS POR SEMPRE SEÑOR

RENUNCIAMOS AO MAL

Celebrante *Neste tempo da Pascua, deixándonos alumar pola luz da fe que recibimos no bautismo, renovamos os nosos compromisos na loita contra o mal.*

Monitor/a

○ **Estades dispostos** a loitar contra o mal que nos fai infelices e nos pecha no egoísmo?

Si, estamos dispostos

○ **Estades dispostos** a loitar contra todo o que nos aparta de Deus e fire aos irmáns e á terra?

Si, estamos dispostos

○ **Estades dispostos** a loitar para que no corazón non aniñe a cobiza, a agresividade e a envexa?

Si, estamos dispostos

PROFESIÓN DA FE

Celebrante Neste tempo da Pascua, deixándonos guiar da man do RESUCITADO compartimos o credo dicindo **SI CREEMOS**

Monitor/a:

Credes en Deus,

Pai e Nai de todos os homes e mulleres, que nos agarima nas súas mans coidadoras e acolledoras?

SI CREEMOS

Credes en Xesús Cristo, o seu fillo benquerido, sempre atento para dar unha man resucitándonos para mellorar e medrar coidando con responsabilidade a vida cos demais?

SI CREEMOS

Credes no Espírito de Deus,

que nos alenta esperanza para soñar irmandade, que nos alenta forza para escandalizarnos ante a guerra, que nos alenta paz para sementala por toda a Terra?.

SI CREEMOS

Credes na Igrexa,

unha Igrexa que se fai crible en comunidade, acolledora, respectuosa e coidadora da terra e de todos os homes e mulleres que en Ucraia se sinten inxustamente tratados?

SI CREEMOS

ORACIÓN UNIVERSAL

Celebrante: Poñamos nas mans de Xesús as nosas pregarías coas que queremos axudar a erguer ás persoas que necesitan ascender na vida. Digamos **SEÑOR DA VIDA, ESCOITA A NOSA ORACIÓN**

Monitor/a:

✓ Señor, queremos erguer camiños de paz, e non calamos agresividades como a vivida nesa escola americana. Oremos

✓ Señor, queremos erguer a vida dos nosos maiores nestas aldeas, aínda que haxa quen pensa que se pode pasar por enriba de nós. Oremos

✓ Señor, queremos erguer a vida das persoas que xa non soñan a esperanza de que este mundo mellore. Oremos

✓ Señor, querendo ser igrexa de fogar, rezamos por Andrés e por todas as persoas que por unhas ou outras razóns non poden acompañarnos. Oremos

✓ Señor, sendo crentes da Pascua, participamos hoxe da festa da Ascensión. Acóllenos no teu Reino cando remate o noso camiñar por estas terras. Oremos

Celebrante: Señor Xesús, grazas porque vas diante preparándonos o camiño, ti que vives e reinas por sempre eternamente. Amén

3.- OS SIGNOS DA COMUÑÓN CON DEUS E COA COMUNIDADE

NOSO PAI

Celebrante: Temos escoitado a Cristo que ascende ao ceo pero non nos deixa sós, por iso alentados polo seu Espírito rezamos a Deus Pai como nos ensinou:

NOSO PAI ...

SIGNO DA PAZ

Celebrante: Temos escoitado moitas veces na nosa sociedade que o importante é competir e ascender. Hoxe festexamos a Ascensión de Cristo, e tendémoslle unha man a todas as persoas que necesitan erguer as súas vidas en camiños de paz, igualdade e dignidade. Fagámonos cribles.

COMUÑÓN

Celebrante: Pola man dos apóstolos aquela primeira comunidade botaba a andar querendo ser mensaxeiros da Boa Nova para todas as xentes.

Nós compartimos en comunidade como signo dunha vida toda ela compartida en servicio cara aos máis necesitados coa esperanza de que eles tamén poidan ascender a unha vida digna. Ditosos nós convidados a esta festa da Pascua do Señor.

Señor, eu non son merecente de que entres no meu fogar, mais unha palabra túa abonda para me salvar

🎵 n° 9 ou 58 *Achate presente na vida*

4.- AVISOS E DESPEDIDA

ORACIÓN FINAL

Celebrante:

Señor, noso Pai,
que a fe que temos compartido,
signo do evanxeo de Xesús,
nos alente no esforzo
por guiar os nosos pasos
polos vieiros do teu reino.

Pedímoscho a Ti que vives e reinas
para sempre eternamente. Amén

Xesús ascende ao ceo para enviar o Espírito que fai de nós servidores e mensaxeiros da Boa Nova.

Nós, alentados polo Espírito Santo, formamos parte desa comunidade en construción erguendo a vida nos camiños da paz, lonxe da agresividade.

Non deixemos que a rutina ou a comodidade nos aparten do proxecto de Xesús, El conta con nós.

Avísase das misas (ver folla do mes)

Que teñamos un bo día, unha boa PASCUA e o Señor nos bendiga, † nos garde de todo mal e nos leve ao seu fogar de vida eterna. Amén




**Bendito ti, Xesús resucitado
coas feridas da lanza e mais os cravos.
Bendito para sempre ti es loado,
bendito ti, Xesús resucitado.**

- 1.- Bendito no aire fresco da mañá
e no cantar do paxaro ao espertar.
Bendito na auga fresca e rebuldeira
que dá vida aos prados e ás leiras.
- 2.- Bendito sexas na terra que agradece
o duro traballar coa súa anada,
bendito na esperanza que se esforza
por chegar a outra terra mellorada.

*(Esta cantiga é a número 84
do cancionero de Os Cotos)*

ALELUIA !! “CRISTO ESTÁ RESUCITADO”

UNIDADE PASTORAL D'OS COTOS



FELICES FESTAS DA PASCUA